

La yerba na parroquia de Carcéu (Valdés)

MANUEL PÉREZ

La seronda

Na parroquia de *Carcéu*, nel conceyu de Valdés, pol outuenu o seronda lo qu'hai que faer yía *esveirar*, o seya, *llimpiar* los alrededores de matos, toxos, artos, etc. En *llimpiándolos* *cúitase* lo más que se puede, espardiendo'l *cuitu* pol prau.

El riegu

Los praos regadíos tienen unas presas qu'hai que tener bien *llimpias* pa qu'entre bien l'augua pol iviernu, que yía cuando hai augua a farta. Suel haber una presa madre de la que salen unos *presinos* que dosifican l'augua pol prau. *Llógrase* de dos maneras l'augua: *asemanada* o *llibre*. L'augua *asemanada* arréglase con un contratu verbal, mui respetáu polos propietarios de praos que disfrutan del riegu. Gracias al contratu'l prau tien l'augua un día o mediu día a la selmana, según la cabida del prau ya los propietarios ya tamién según la cantidá d'augua qu'hubiera. L'augua *llibre* échala'l que yía pa ello ya dase asina'l casu de qu'un prau tien augua tres días ya outru denguenu.

Llindiar ya moscar

Llindiar las vacas yía un trabayu más bien de nenos ya viechos ya yera mui pesáu porque cuando yá nun tenían pastu escapaban a outros praos a comer. Amás, en branu solían *moscar*, echando a correr pola mor de los tábanos, que pican ya chupan la sangre.

La siega

La yerba seca val p'alimentar a los animales nos meses d'iviernu. Val comu alimentu únicu pa las vacas, oveyas, cabras ya caballos.

La siega entámase a partir de San Xuan ya dura hasta finales del mes de Santa Marina. Faise con *gadañu* ya'l día antias pónense d'acuerdu dellos vecinos ya al amanecer o al escurecer van al prau colos sous *gadaños* bien *clabuñaos*. Las ferramientas pa clabuñar son el *martiellu* ya la *inclá*. Van tamién los nenos pa *esmarallar*, porque a los segadores nun-llys presta nada *esmarallar* después de segar.

La siega tradicional entamaba nuna esquina, pola parte onde primeiru daba'l sol si yía al amanecer, pa que cuando saliera nun-llys diera de frente ya si yera pola tarde entamábase por onde yá había solombra.

Los *marallos* yeran simples ya faíanse de llau especialmente en sitios emplunos, porque daban menos tiru. Cada segador podía llevar de llau a llau'l *marallu*, completu, pero lo más normal yera que se fuera *ascontra*, que yía llevar el mesmu *marallu* un cachu cada segador.

Había verdaderos especialistas na preparación del *gadañu*, lo mesmo clabuñando qu'*afilando*. Entrambas cousas yeran muito importantes pa ser buen segador. P'afilar el *gadañu* llévase una piedra nel *zapicu*, llamáu tamién *canáu* o *cachapu*. You conocí a unu que tenía un *gadañu* qu'afeitaba ya cuando daba una *gadañada* ya quedaba repelu, segábalu al sacar el *gadañu* p'atrás.

Cuandu la yerba yera mui grande ya taba encamada

había que la segar *a punta gadañu*. Esto de segar a punta gadañu yera dar dos emburriones al gadañu al dar la gadañada, porque al ser grandona la yerba nun podía dase entera. Dempués cona punta'l gadañu sacábase la yerba.

La siega yera un trabayu duru por demás ya pola mor d'ello daba muita fame. Si la siega yía pola mañana empiézase alrededor de las cinco ya a las siete y media llega l'*almuerzu*. Nel almuerzu hai tortiella de pataca, xamón ya café, con pan ou *fuaza*. La fuaza yía'l pan de maíz.

A las once ou doce llegaba la cesta de la comida gorda, con xamón, chourizu, empanada, queisu, ya too bien regao con tintu de los Mourinos, que tando sentaos a la solombra d'una bedul entraba muito bien. Por supuestu, esta comida tenía que la dar el dueñu del prau.

Esmarañlar ya aborregar

Pa trabayar cola yerba úsanse'l *garabatu* ya la *garabata*. El *garabatu* yía más pequenu ya úsase pa pradiar la yerba verde, pero la *garabata* yía más grande ya val pa pradiar la yerba seca. Comu ye más grande lleva una forquina p'amarrar bien el mangu.

Dempués de segar hai qu'*esmarañlar*, cousa que yía propia de nenos o de vieyos que yá nun son pa tirar pol gadañu. Esmarañlar yía esparder el marallu pa que la yerba cure curiosa.

Si había buen sol, al outru día ou al outru *dáse-ll* y la *vuelta* a la yerba alrededor de las doce ya pola tarde. Hai qu'*aborregar*, que yía faer montones pequenos de yerba. Al aborregar va secando'l terrén ya al outru día espárdese outra vuelta pa que siga curando la yerba. Dábase una vuelta ou dúas ya pa faelo usábase'l *forcáu*, que yía un palu que termina en forma d'U ya que yía mui usáu, especialmente pa dar vuelta a la yerba seca.

Si hai bon tiempu ya faise bien la yerba *cura*, pero siempre que la siega seya dempués de San Pedru, porque antias de San Pedru considérase la yerba mui *nieta*. La yerba *nieta* necesita más cura ya, pola mor d'ello, más

vueltas ya más montones. Cuandu se faen los montones na segunda vuelta llámase-ys *morenas* a estos montones, que son más grandes.

El balagar

En curando la yerba, hai que la carretar a onde s'*emballaga*. Pa carretar úsase'l carru, que va atáu al *xugu* gracias al *xubexu*. Las *mullidas*, las *melandreras* ya las *mosqueras* protexen el xugu ya las cabezas de las vacas.

Los *balagares* faense nel mesmu prau o al *llau* de la cuadra, onde va consumise. El balagar yía un montón de yerba con una *vara* pol mediu, en forma de bombiella. Queda al aire *llibre*, pero nun se mueya si queda bien feitu. Pa faer el balagar hai que plantar una vara bien espetada na tierra. La vara tien d'ochu a diez metros de *llarga* ya polo menos hai que la enterrar un metru. Dempués faise'l *culu* del balagar ya pa esto pónense maderos hasta que paez que la yerba queda estremada del suelu.

Cuandu'l balagar se fai nel prau onde se cura, va axunándose la yerba alreduro de la vara. Si se fai al *llau* de la cuadra, acarretábase la yerba nos carros del país, tiraos por vacas o por bueis. Tamién la yerba podía *llevarse a cargas*, o seya, al *llombu* de los vecinos qu'ayudaban. Fixérase comu se fixera'l *acarretu*, la yerba poníase cerca d'onde diba faese'l balagar, porque asina yera más fácil apurrila.

El que fai'l balagar pónese al *llau* de la vara ya los outros van apurriendo la yerba cona pala dientes, tirando la yerba a paladas xunto a la vara, mientras el que fai'l balagar va esparciendo la yerba a brazaos ya calculando'l *vuelu* del balagar según la yerba que tien.

En terminando d'apurrir la yerba vien la primera *mayada* al balagar, que yía que con un forcáu grande va *mayándose* el balagar pa dir sacando yerba ya dir zarrándolu. Cuantu más se maye'l balagar queda más macizu, porque al mayalu primero dende arriba y dempués dende abaxu, *pénase* el balagar con un garabatu ya nun entran goteras

de lo macizu que queda. Dempués pónense las *corras*, que se faen retorciendo yerba del mesmu balagar. La corra métese pola punta la vara bien apretada pa que nun entre l'augua al arroyar. Normalmente pónense dos corras, pa meyor defensa del balagar.

El parreiru ya la tenada

La yerba guárdase tamién nel *payar* o *parreiru*, que tien una paré pal norte ya pal oeste ya un zarramientu de madera comu unas rexas pal este ya pal sur pa qu'entrara l'aire.

Almacénase tamién la yerba na *tenada*, que ta encima la cuadra ya que tien nel suelu de madera una puerta que se llama *trampa* pa tirar dende allí la yerba al *preselbe* del ganáu.

La yerba hai que la *esmesar*, igual del balagar que del *payar* o *parreiru* ya diciáse que rendía más asina. Del *parreiru* esmésase a *tayas*, d'arriba p'abaxu. Del balagar empieza a esmesase a l'altura d'una persona ya diba esmesándose alreder. Asina de la que se diba consumiendo la yerba'l balagar diba baxando. You tengo visto balagares de ochu metros d'altura que quedaban nun metru, ensin esbarrigase, cousa mui importante pa nun se moyar la yerba.